

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**Z A K L J U Ć A K**

**o odbacivanju Prijave koncentracije između privrednih subjekata Mješoviti holding  
„Elektroprivreda Republike Srpske“ matično preduzeće a.d. Trebinje, Bosna i Hercegovina  
i „Hrvatska elektroprivreda“ d.d. Zagreb, Republika Hrvatska**

**Sarajevo,  
decembar, 2012. godine**



**Broj: 03-26-1-016-10-II/12**  
**Sarajevo, 20. decembar 2012. godine**

U skladu sa članom 25. stav (1) tačka e), a na osnovu člana 42. stav (2), u vezi s članom 12. i 14. Zakona o konkurenciji («Službeni glasnik BiH», br. 48/05, 76/07 i 80/09), a rješavajući po Prijavi koncentracije privrednih subjekata Mješoviti holding „Elektroprivreda Republike Srpske“ Matično preduzeće a.d. Trebinje ul. Stepe Stepanovića b.b. Trebinje, Bosna i Hercegovina i „Hrvatska elektroprivreda“ d.d. Zagreb, ul. Grada Vukovara br. 37, Zagreb, Republika Hrvatska, koje zastupa advokat Jugoslav Milanović, advokat iz Trebinja, ul. Luke Petkovića br. 1., Trebinje, zaprimljenoj dana 11. oktobra 2012. godine pod brojem: 03-26-1-016-II/12, Konkurencijsko vijeće, na 49. (četrdesetdevetoj) sjednici održanoj dana 20. decembra 2012. godine, je donijelo

### **Z A K L J U Č A K**

1. Odbacuje se Prijava koncentracije privrednih subjekata Mješoviti holding „Elektroprivreda Republike Srpske“ Matično preduzeće a.d. Trebinje ul. Stepe Stepanovića b.b. Trebinje, Bosna i Hercegovina i „Hrvatska elektroprivreda“ d.d. Zagreb, ul. Grada Vukovara br. 37, Zagreb, Republika Hrvatska, radi nepostojanja obaveze prijave koncentracije u smislu člana 14. stav (1) Zakona o konkurenciji.
2. Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Konkurencijsko vijeće je zaprimilo 11. oktobra 2012. godine Prijavu koncentracije (u daljem tekstu: Prijava) od strane privrednih subjekata Mješoviti holding „Elektroprivreda Republike Srpske“ Matično preduzeće a.d. Trebinje ul. Stepe Stepanovića b.b. Trebinje, Bosna i Hercegovina (u daljem tekstu: EP RS Trebinje) i „Hrvatska elektroprivreda“ d.d. Zagreb, ul. Grada Vukovara br. 37, Zagreb, Republika Hrvatska (u daljem tekstu: HEP Zagreb), (u daljem tekstu za oba: Podnosioci Prijave) koje zastupa advokat Jugoslav Milanović, advokat iz Trebinja, ul. Luke Petkovića br. 1., Trebinje, podnesena na temelju (..)\*\*<sup>1</sup> između Podnosioca Prijave.

Prijava koncentracije je podnesena u smislu člana 16. stav (2) Zakona.

Uvidom u podnesenu Prijavu utvrđeno je da ista nije potpuna, u smislu člana 30. stav (1) Zakona o konkurenciji (u daljem tekstu: Zakon) i člana 9. i 11. Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 34/10), te je Konkurencijsko vijeće, u skladu sa članom 31. istog Zakona, zatražilo dopunu dana 15. novembra 2012. godine, aktom broj: 03-26-1-016-1-II/12.

---

<sup>1</sup> (..)\*\*- podaci predstavljaju poslovnu tajnu u smislu članka 38. Zakona o konkurenciji.

Podnosioci prijave, u smislu člana 31. stav (2) Zakona, su zatražili produženje vremenskog roka za kompletiranje Prijave (podnesak broj: 03-26-1-016-2-II/12 dana 22. novembra 2012. godine), nakon čega je Konkurencijsko vijeće prihvatilo zahtjev i odobrilo produženje roka za dostavljanje tražene dokumentacije (akt broj: 03-26-1-016-3-II/12 od dana 22. novembra 2012. godine).

Podnosioci prijave su u skladu sa zahtjevom Konkurencijskog vijeća, dostavili dokumentaciju koja je nedostajala dana 23. novembra 2012. godine, broj: 03-26-1-016-4-II/12.

Konkurencijsko vijeće je Podnosiocima prijave izdalo Potvrdu o prijemu uredne i kompletne Prijave, u smislu člana 30. stav (3) Zakona, dana 29. novembra 2012. godine broj: 03-26-1-016-5-II/12.

Podnosioci Prijave su naveli da smatraju kako nemaju obavezu prijave koncentracije od strane ovlaštenih tijela bilo koje države, osim Bosne i Hercegovine.

Konkurencijsko vijeće je izdalo, u skladu sa članom 16. stav (4) Zakona, Obavještenje o dostavljenoj Prijavi (akt broj: 03-26-1-016-7-II/12 od 29.11.2012. godine) u dnevnoj štampi Bosne i Hercegovine, u kojoj je objavilo podatke o koncentraciji, te pozvalo sva zainteresirana lica na dostavljanje pisanih komentara u pogledu provedbe iste. Na predmetno Obavještenje, Konkurencijskom vijeću nisu dostavljene primjedbe i mišljenja.

## **1. Sudionici u postupku**

Sudionici koncentracije su privredni subjekti Mješoviti holding „Elektroprivreda Republike Srpske“ Matično preduzeće a.d. Trebinje ul. Stepe Stepanovića b.b. Trebinje, Bosna i Hercegovina i „Hrvatska elektroprivreda“ d.d. Zagreb, ul. Grada Vukovara br. 37, Zagreb, Republika Hrvatska.

### **1.1. Privredni subjekt Mješoviti holding „Elektroprivreda Republike Srpske“ Matično preduzeće a.d. Trebinje**

Mješoviti holding „Elektroprivreda“ Republike Srpske Trebinje – Matično preduzeće a.d. Trebinje, registrirano je u sudskom registru Okružnog suda u Trebinju, pod brojem: MBS 62-05-0026-11, kojeg zastupa Generalni direktor Branislava Milekić dipl. ecc., sa osnovnim predmetom poslovanja proizvodnja, distribucija, dostava i trgovina električnom energijom.

Privredni subjekt EP RS Trebinje je Odlukom Vlade RS br. 04/1-012-2000/06 od 7.9.2006. godine organizirana kao Mješoviti holding koji se sastoji od Matičnog preduzeća a.d. Trebinje i 11 ovisnih preduzeća.

Matično preduzeće a.d. Trebinje je osnovano kao jednočlano dioničko društvo sa 100% državnim kapitalom, sa sjedištem u Trebinju, ul. Stepe Stepanovića b.b., a funkciju Skupštine dioničara Matičnog preduzeća a.d. Trebinje vrši Vlada Republike Srpske.

Skraćeno ime Matičnog preduzeća je MP a.d. Trebinje. Matično preduzeće a.d. Trebinje je većinski vlasnik kapitala u 10 ovisnih proizvodnih i distributivnih preduzeća sa 65% i 51% kapitala u IRCE.

Udio Matičnog preduzeća u osnovnom kapitalu pojedinih ovisnih preduzeća EP RS Trebinje:

Tabela 1.

R.b.	Naziv privrednog subjekta	Vlasnički udio (%)
1.	HE na Trebišnjici a.d. Trebinje	64,99822
2.	HE na Drini a.d. Višegrad	65,00040
3.	HE na Vrbasu a.d. Mrkonjić Grad	64,99942
4.	RiTe Gacko a.d. Gacko	65,00000
5.	RiTe Ugljevik a.d. Ugljevik	65,00176
6.	Elektrokrajina a.d Banja Luka	65,00559
7.	Elektro Doboj a.d Doboj	65,00282
8.	Elektro Bijeljina a.d Bijeljina	65,00260
9.	Elektrodistribucija a.d Pale	62,00825
10.	Elektrohercegovina a.d Trebinje	64,998217
11.	Istraživačko razvojni centar – IRCE	51*
12.	HE Dabar d.o.o Trebinje	100**

Izvor: Podaci iz Prijave; \*51% odnosi se na direktni udio; \*\* ERS ima 30% direktnog udjela i 70% preko HE na Trebišnjici a.d. Trebinje

EP RS Trebinje je jedna od dva partnera u zajedničkom ulaganju Nove Elektrane Republike Srpske d.o.o. za proizvodnju i prodaju električne energije Gacko, sa sjedištem u Gacku, Industrijska zona b.b., Gacko, Republika Srpska, BiH (u daljem tekstu: NERS).

NERS je zajedničko ulaganje između EP RS Trebinje i Čez a.s. sa sjedištem u Duhová 2/1444, 140 53 Prag 4, Republika Češka (ČEZ), u kojem ERS drži 49 %, a ČEZ 51 % udjela. NERS nema udjele u drugim društvima.

## 1.2. Privredni subjekt Hrvatska elektroprivreda d.d. Zagreb

Privredni subjekt Hrvatska elektroprivreda d.d. Zagreb, ul. Grada Vukovara br. 37, Zagreb, Republika Hrvatska, registriran je kod Trgovačkog suda u Zagrebu, pod brojem: MBS 080004346, a kojeg zastupa Predsjednik uprave Zlatko Koračević dipl.ing. Osnovni predmet poslovanja je proizvodnja, prijenos, distribucija, opskrba i trgovina električnom energijom.

HEP Zagreb je organiziran u obliku Koncerna kao grupacija povezanih društava (tvrtke kćerke). Vladajuće društvo (Matica) grupe je HEP Zagreb koje obavlja funkciju korporativnog upravljanja HEP grupom i jamči uslove za sigurnu i pouzdanu opskrbu kupaca električnom energijom. Unutar HEP grupe jasno su odvojena (upravljačko, računovodstveno i pravno) društva koja obavljaju regulirane djelatnosti (prijenos i distribucija) od nereguliranih djelatnosti (proizvodnja i opskrba).

### a) Proizvodnja

HEP grupa raspolaže sa 4.000 MW instalirane snage za proizvodnju električne energije i 974 MW snage za proizvodnju topline. U sastavu HEP Proizvodnje d.o.o. je 25 hidroelektrana i osam termoelektrana, koje kao pogonsko gorivo koriste loživo ulje, prirodni gas i ugalj, neke od njih u spojenom procesu proizvode električnu i toplotnu energiju i čine okosnicu centraliziranog toplotnog sistema Zagreba i Osijeka. Na području BiH nalazi se Crpna stanica Buško blato d.o.o. tvrtka kćerka HEP Proizvodnje d.o.o.

Osim proizvodnje, električnu energiju u grupi HEP proizvodi i TE Plomin d.o.o. društvo u suvlasništvu HEP Zagreb i RWE Power, koje upravlja termoelektranom snage 210 MW. HEP d.d. je suvlasnik i Nuklearne elektrane Krško u Republici Sloveniji.

HEP obnovljivi izvori energije d.o.o. bave se pripremom, izgradnjom i korištenjem obnovljivih izvora energije (vjetar, biomasa, Sunčeva energija, mali vodotoci, geotermalne vode i dr.). Ukupna proizvodnja HEP grupe u 2011. godini iznosi 12,7 TWh električne i toplotne energije.

#### b) Prijenos i distribucija

Uz proizvodne izvore, važan dio sistema su prijenosna i distribucijska mreža (ukupno 24 hiljade transformatorskih stanica i više od 140 hiljada kilometara vodova različitih naponskih nivoa).

HEP operator prijenosnog sistema d.o.o. i HEP Operator distribucijskog sistema d.o.o. obavljaju usluge prijenosa i distribucije električne energije za potrebe sudionika na hrvatskom tržištu.

#### c) Opskrba

U Hrvatskoj ima više od 2,3 miliona kupaca, odnosno mjernih mjesta za isporučenu električnu energiju. Za opskrbu tarifnih kupaca zadužen je HEP Operator distribucijskog sistema d.o.o. dok je u opskrbi povlašćenih kupaca, HEP Opskrba d.o.o. izložena konkurenciji ostalih elektroprivrednih subjekata na tržištu.

#### d) Ostale energetske djelatnosti

HEP Trgovina d.o.o. obavlja djelatnosti kupnje i prodaje električne energije, optimizacije rada elektrana te trgovinskog posredovanja na domaćem i inostranom tržištu.

HEP Toplinarstvo d.o.o. bavi se proizvodnjom, distribucijom i opskrbom toplotnom energijom, a djeluje na području gradova Zagreba, Osijeka i Siska te dijela Zagrebačke županije.

HEP Plin d.o.o. prirodnim gasom opskrbljuje kupce na području Osječko-baranjske, Požeško-slavonske i Virovitičko-podravske županije.

HEP-ESCO d.o.o. tvrtka je za pružanje usluga u energetici koja razvija, izvodi i finansira tržišno utemeljene projekte energetske učinkovitosti.

#### e) Ostale djelatnosti

APO d.o.o. usluga zaštite okoliša konsultantska je i inženjering tvrtka specijalizirana za poslove zaštite okoliša, a posebno za poslove s opasnim i radioaktivnim otpadom, te radioaktivnim materijalom.

HEP nastavno-obrazovni centar, Velika, obrazovna je ustanova koja, uz stručno osposobljavanje i usavršavanje za rad pod naponom, povodi programe srednjoškolskog obrazovanja odraslih te organizira stručna savjetovanja, seminare i tečajeve.

Društvo HEP Odmor i rekreacija d.o.o. za pružanje turističke i ugostiteljske usluge, te organiziranje sportske rekreaciju za radnike HEP grupe.

U aprilu 2012. godine registrirano je i društvo HEP – Razvoj višenamjenskih nekretninskih projekata d.o.o.

## **2. Relevantno tržište koncentracije**

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod

prihvatljivim uslovima, imajući u vidu osobito njihove bitne karakteristike, kvalitet, uobičajnu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupan ili dio teritorija Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Na osnovu podataka iz Prijave, relevantno tržište proizvoda u konkretnom slučaju je tržište proizvodnje električne energije.

Relevantno tržište u geografskom smislu smatra se tržište na cijelom teritoriju Bosne i Hercegovine.

Slijedom navedenoga, relevantno tržište koncentracije je proizvodnja električne energije u Bosni i Hercegovini.

## 2.1. Analiza - relevantno tržište koncentracije

Elektroenergetski sektor u BiH prolazi kroz opsežan proces restrukturiranja. Trenutno u BiH postoje jedino tri velika društva koja djeluju na elektroenergetskom sektoru u BiH:

- Elektroprivreda Republike Srpske a.d. Trebinje (u daljem tekstu: EP RS Trebinje);
- Elektroprivreda Bosne i Hercegovine d.d. Sarajevo (u daljem tekstu: EP BiH Sarajevo);
- Elektroprivreda Hrvatske zajednice Herceg Bosne d.d. Mostar (u daljem tekstu: EP HZHB Mostar), a koje se još uvijek ne nalaze u tržišnoj konkurenciji.

Sva tri privredna subjekta su osnovana u svrhu proizvodnje, distribucije i prodaje električne energije, dok prijenos električne energije na državnom nivou vrše NOS i Elektroprenos BiH Banjaluka. Ove tri elektroprivredne tvrtke posluju na tri potpuno odvojena teritorija i efektivno ne predstavljaju konkurente na relevantnom tržištu.

Procjena tržišnih udjela privrednih subjekta sudionika koncentracije kao i njihovih glavnih tržišnih konkurenata na relevantnom tržištu:

Ukupna procjenjena proizvodnja električne energije u Bosni i Hercegovini iznosi:

Tabela 2.

R.b.	Privredni subjekt	Ukupna proizvodnja (GWh)	Tržišni udjel (%)
1.	EP BiH	7.352,47	50,56
2.	EP RS	5.295,46	36,42
3.	EP HZHB	1.402,00	9,64
4.	Ostali proizvođači	490,76	3,38
	Ukupno	14.540,69	100,00

Izvor: prijava; podaci Državna regulatorna komisija Bosne i Hercegovine (DERK);

Ukupna proizvodnja električne energije u Bosni i Hercegovini za 2011. godinu iznosila je 14.540,69 GWh, a ukupna potrošnja na domaćem tržištu iznosila je 12.592,57 GWh. Uključujući i 876,00 GWh koje je Aluminij d.d. Mostar nabavio slobodno na tržištu kao kvalificirani kupac (uvoz). Dakle, tržišni udio EP RS Trebinje prije predmetne koncentracije je u Bosni i Hercegovini je 36,42%.

Nakon što se realizira projekat izgradnje HE Dubrovnik II ili nakon 2017. godine u EP RS Trebinje, proizvodnja će biti povećana za 318,4 GWh. Ovo povećanje proizvodnih kapaciteta može povećati udio EP RS Trebinje na relevantnom tržištu, ali ni u kojem slučaju preko 39%. Pri tome treba imati u vidu da će 50 % proizvedene energije pripasti HEP Zagreb.

### 3. Obaveza prijave koncentracije

U skladu sa članom 14. stav (1) tačke a) i b) Zakona, obaveza prijave koncentracije postoji kada sudionici koncentracije prodajom roba i/ili usluga ostvare na svjetskom tržištu 100 miliona KM po završnom računu u godini koja je prethodila koncentraciji i kada ukupni godišnji prihodi svakog od najmanje dva privredna subjekta sudionika koncentracije ostvareni prodajom roba i/ili usluga na tržištu Bosne i Hercegovine iznose najmanje 8 miliona KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,0%.

Ukupni godišnji prihodi sudionika koncentracije (i s njima povezanih privrednih subjekata), na dan 31. decembra 2011. godine, iznose:

Tabela 3.

	<b>EP RS Trebinje</b>	<b>HEP Zagreb</b>
	<b>Prihod u KM</b>	<b>Prihod u KM</b>
Svijet	(..)** <sup>2</sup>	(..)**
BiH	(..)**	(..)**

Izvor: podaci iz Prijave \*kursna lista CBBIH dan 11.12.2012.godine (preračun sa HRK u BAM)

Godišnji prihodi sudionika koncentracije (Tabela 3.) predstavljaju ukupne prihode ostvarene prodajom roba i/ili usluga (bez poreza na dodatnu vrijednost i drugih direktnih poreza), u smislu člana 9. tačka h) Odluke o načinu podnošenja prijave i kriterija za ocjenu koncentracija privrednih subjekata.

Članom 14. stav (3) Zakona je utvrđeno da u slučaju da se koncentracija odnosi na spajanje ili pripajanje dijela ili dijelova jednog ili više privrednih subjekata, bez obzira da li ti dijelovi imaju status pravnog lica, pri izračunu prihoda, obračunavat će se samo prihod onih dijelova privrednog subjekta koji su predmetom kontrole koncentracije.

Analizom navedenih podataka utvrđeno je da sudionici predmetne koncentracije ne ispunjavaju uslove iz člana 14. stav (1) tačka a) i b) Zakona jer ukupni prihod privrednog subjekta EP RS Trebinje ostvaren prodajom roba i/ili usluga na svjetskom tržištu iznosi manje od 100 miliona KM (Tabela 3.), a ukupni prihod privrednog subjekta HEP Zagreb ostvaren prodajom roba i/ili usluga na tržištu Bosne i Hercegovine iznosi manje od 8 miliona KM.

Također, sudionici koncentracije nisu ispunili niti uslov da je njihov zajednički tržišni udio na relevantnom tržištu veći od 40,0% (Tabela 1.).

### 4. Pravni osnov i oblik prijave koncentracije

Pravni osnov koncentracije predstavlja Memorandum o razumijevanju za Projekat izgradnje Hidroelektrane Dubrovnik II faza, kojim je iskazana namjera zajedničkog ulaganja na dugoročnoj

<sup>2</sup> (..)\*\*- podaci predstavljaju poslovnu tajnu u smislu članka 38. Zakona o konkurenciji.

osnovi dva neovisna privredna subjekta. Memorandum o razumijevanju potpisan je dana 3. oktobra 2012. godine u Trebinju od strane ovlaštenih zastupnika HEP Zagreb, tj. Predsjednika Uprave g. Zlatka Koračevića, s jedne strane i ovlaštenih zastupnika EP RS Trebinje, tj. Generalnog direktora gđe. Branislave Milekić i Izvršnog direktora za investicije i razvoj g. Vladislava Vadičića, s druge strane.

Potpisani Memorandum o razumijevanju je neobavezujućeg i preliminarnog karaktera.

Pravni oblik koncentracije, u skladu sa članom 12. stav (1), tačka c) Zakona predstavlja zajedničko ulaganje na dugoročnoj osnovi, dva ili više privrednih subjekata, koji djeluju kao neovisni privredni subjekti.

## **5. Ocjena prijave koncentracije**

Konkurencijsko vijeće je utvrdilo iz podataka Prijave i dostavljene dokumentacije da koncentracija ne ispunjava uslove iz člana 14. stav (1) Zakona.

Uzimajući u obzir navedeno, Konkurencijsko vijeće je odlučilo kao u dispozitivu ovog Zaključka.

## **6. Administrativna taksa**

Podnosilac prijave na ovaj Zaključak, u skladu sa članom 2. stav (1) tarifni broj 108. tačka c) Odluke o administrativnim taksama u vezi procesnih radnji pred Konkurencijskim vijećem («Službeni glasnik BiH», broj 30/06 i 18/11) je dužan platiti administrativnu tasku u ukupnom iznosu od 1.000,00 KM u korist Budžeta institucija Bosne i Hercegovine.

## **7. Pouka o pravnom lijeku**

Protiv ovoga Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Zaključka.

**Predsjednica**

**Gordana Živković**

### **Dostaviti:**

- **Podnosiocu prijave**
- **u spis**
- **arhiv Konkurencijskog vijeća**



